

Na osnovu člana 40. stav 2. tačka e) Zakona o ličnoj karti državljana Bosne i Hercegovine ("Službeni glasnik BiH", br. 32/01, 16/02, 32/07, 53/07, 56/08 i 18/12), Ministarstvo civilnih poslova donosi

P R A V I L N I K
O NAČINU UZIMANJA BIOMETRIJSKIH PODATAKA
U POSTUPKU IZDAVANJA LIČNIH KARATA

Član 1.
(Predmet)

Pravilnikom o načinu uzimanja biometrijskih podataka u postupku izdavanja ličnih karata (u daljem tekstu: Pravilnik), propisuje se način uzimanja biometrijskih podataka i to uzimanje fotografije, uzimanje otisaka prstiju i potpisa.

Član 2.
(Nadležnost i sadržaj biometrijskih podataka)

- (1) Biometrijske podatke uzimaju službenici nadležnog organa iz člana 7. Zakona o ličnoj karti državljana BiH.
- (2) Prilikom podnošenja zahtjeva za izdavanje lične karte, uzimaju se sljedeći biometrijski podaci podnosioca zahtjeva:
 - 1) fotografija;
 - 2) otisci prstiju;
 - 3) potpis.

Član 3.
(Uzimanje biometrijskih podataka)

- (1) Pod uzimanjem biometrijskih podataka, podrazumijeva se uzimanje podataka pomoću odgovarajućih tehničkih sredstava i prevođenje tih podataka u elektronski oblik (u daljem tekstu: uzimanje).
- (2) Starom, bolesnom i licu sa invaliditetom može se omogućiti podnošenje zahtjeva i uzimanje biometrijskih podataka na olakšani način, putem mobilne radne stanice.

Član 4.
(Uzimanje fotografije)

- (1) Uzimanje fotografije se vrši digitalnom kamerom.
- (2) Fotografija mora ispunjavati sljedeće uvjete:
 - a) izoštrena i jasna,
 - b) prikazuje lice koje direktno gleda u kameru, a ne da gleda preko ramena (portret stil) ili u stranu, i jasno prikazuje obje ivice lica,
 - c) prikazuje prirodne tonove kože,
 - d) ima odgovarajuću jačinu svjetlosti i kontrast,
 - e) biti neutralna na boje,
 - f) prikazuje otvorene i jasno vidljive oči bez kose preko njih,
 - g) biti snimljena sa ravnom i svijetlo obojenom pozadinom,
 - h) biti snimljena pri univerzalnom osvjetljenju bez sjenki ili odbleska blica na licu i bez crvenih očiju,

- i) snimak mora prikazati oči jasno, bez odsjaja blica na naočalama, i bez obojenih sočiva, (ako je moguće izbjegavati teške okvire – naočare sa lakšim okvirom),
 - j) provjeriti da okviri naočala ne smiju pokrivati niti jedan dio očiju,
 - k) pokrivala za glavu nisu dozvoljena, osim iz religioznih razloga, ali karakteristike lica od početka brade do vrha čela, kao i obje ivice lica moraju biti jasno prikazane.
- (3) Radi ispunjenja gore navedenih uvjeta, fotografiranje se vrši na način opisan na slici u Prilogu broj 1.

Član 5.

(Uzimanje otisaka prstiju)

- (1) Uzimanje otiska prstiju vrši se skenerom za otiske i podrazumijeva uzimanje otiska lijevog i desnog kažiprsta i lijevog i desnog palca, na dodir.
- (2) Ako lice nema kažiprst ili palac, odnosno oba prsta, uzima se otisak narednog prsta i to ovim redoslijedom: palac, kažiprst, srednji prst, domali prst i mali prst.
- (3) U slučaju iz stava 2., ili ukoliko lice nema jedne, odnosno obje ruke, na zahtjevu za izdavanje lične karte, na poleđini zahtjeva, službeno lice upisuje podatak sa kojih prstiju je uzet otisak, odnosno da uzimanje otiska nije moguće, što svojim potpisom i potvrđuje.

Član 6.

(Uzimanje potpisa)

- (1) Uzimanje potpisa se vrši pomoću table za digitalizaciju potpisa. Potpis mora biti originalan, svojeručan, treba minimalno sadržavati puno ime ili puno prezime podnosioca zahtjeva i biti ispisan pisanim slovima. Pod pojmom originalan potpis podrazumijevamo potpis koji podnosilac zahtjeva koristi ili ima namjeru koristiti u pravnom prometu.
- (2) Ako je lice nepismeno ili uzimanje potpisa nije moguće iz drugih objektivnih razloga, na obrascu lične karte mjesto za potpis ostaje prazno, a službeno lice na poleđini zahtjeva navodi razloge nemogućnosti uzimanja potpisa, što potvrđuje svojim potpisom.

Član 7.

(Stupanje na snagu)

Ovaj Pravilnik stupa na snagu osmog dana od dana objavljivanja u „Službenom glasniku BiH“, a primjenjivat će se od dana donošenja Odluke o početku izdavanja ličnih karata sa elektronskim memorijskim elementom.

Broj 06-30-2-3402/12
14. decembra 2012. godine
Sarajevo

Ministar
Mr. **Sredoje Nović**, s.r.

PRILOG 1

